



Republika e Kosovës
Republika Kosova-Republic of Kosovo

Oda e infermierëve, mamive dhe profesionistëve tjerë shëndetësor të Kosovës
Komora medicinskih sestara, babica i ostalih zdravstvenih stručnjaka Kosova
The Kosovo Chamber of nurses, midwives and other health professionals



RR E G U L L O R E
PËR PËRCAKTIMIN E FUSHËVEPRIMIT TË PROKURORIT TË ODËS
NË PROCEDURAT E MBIKËQYRJES ETIKE

Prishtinë, 2025

KUVENDI I ODËS SË INFERMIERËVE TE KOSOVËS, në mbështetje të Nenit 9, paragrafit 1 me nën-paragrafin 1.6 dhe 1.10 dhe Nenin 19, paragrafin 1 me nën-paragrafin 1.1 të Ligjit Nr. 04/L-150 për Odat e Profesionistëve Shëndetësorë; Nenin 14, paragrafin 1 me nën-paragrafin 1.6 dhe Nenin 19, paragrafin 1 me nën-paragrafin 1.1 të Statutit të Odës, në mbledhjen e rregullt të datës 27.02.2025, miraton:

RR E G U L L O R E P Ë R P Ë R C A K T I M I N E F U S H Ë V E P R I M I T T Ë P R O K U R O R I T T Ë O D Ë S N Ë P R O C E D U R A T E M B I K Ë Q Y R J E S E T I K E

Kapitulli I – Dispozitat e Përgjithshme

Neni 1

Qëllimi

Rregullorja për përcaktimin e fushëveprimit të Prokurorit të Odës në procedurat e mbikëqyrjes etike, ka për qëllim precizimin e rolit dhe pozitës procedurale të Prokurorit të Odës në procedurat administrative që zhvillohen pranë organeve kompetente të OIK për mbikëqyrje etike dhe profesionale pranë OIK.

Neni 2

Fushëveprimi

Kjo rregullore zbatohet vetëm gjatë zhvillimit të procedurave pranë Prokurorit për mbikëqyrje etike dhe profesionale të OIK lidhur me përgjegjësinë disiplinore të anëtarëve të OIK gjatë ushtrimit të profesionit të paraqiturit lidhur me respektimin e Kodit Etik dhe Deontologjisë të Odës.

Neni 3

Përkufizimet

1. Termet dhe akronimet e përdorura në këtë rregullore kanë këtë kuptim:
 - 1.1 **Prokurori** – nënkupton Prokurorin dhe zëvendësprokurorin e Odës si organ i paraparë me dispozitat e Ligjit për Odat e Profesionistëve Shëndetësor dhe Statutin e Odës;
 - 1.2 **Dyshimi i bazuar** – nënkupton rrethanën të mbështetur në prova të artikulueshme që do të bënin të bindshëm nga pikëpamja objektive se i paraqituri me veprimin apo mosveprimin e tij ka shkelur Kodin Etik, legjislacionin nga fusha e shëndetësisë apo Statutin e Odës;
 - 1.3 **Palët**– janë subjektet të cilat kanë të drejtë të paraqesin ankesë ndaj i paraqiturit për të cilin pretendojnë se ka vepruar në kundërshtim me ligjin, Statutin apo Kodin Etik;
 - 1.4 **Akti iniciues**– nënkupton aktin kërkesën me të cilën iniciohet procedura disiplinore etike , e parashtruar nga palët e autorizuara;
2. Termet dhe fjalitë që nuk janë të përfshira në përkufizimet sipas kuptimeve të dhëna në paragrafin 1 të këtij neni, do të interpretohen sipas kuptimeve të përgjithshme gjuhësore dhe njohurive të përgjithshme shkencore dhe teknike.

Kapitulli II – Shkelja dhe përgjegjësia etike

Neni 4

Shkelja etike

Shkelja etike është veprim në kundërshtim me dispozitat e Kodit të Etikës dhe Deontologjisë të Odës dhe me këtë rregullore, veprim i cili është në kundërshtim me standardet dhe ndërgjegjen profesionale, tiparet e së cilës janë përcaktuar me dispozitat e Kodit Etik dhe kësaj rregullore dhe masat disiplinore për shkeljet të tilla që janë përcaktuar me ligj, Statutin e Odës, Kodin Etik dhe këtë Rregullore.

Neni 5

Mënyra e shkeljes etike

1. Shkelja etike mund të kryhet me veprim apo me mosveprim.
2. Shkelja etike kryhet me mosveprim vetëm atëherë kur shkelësi nuk e ka ndërmarrë një veprim të cilin ka qenë i obliguar që ta ndërmerr.

Neni 6

Përgjegjësia etike

1. Për shkeljen etike **anëtari** është përgjegjës nëse në kohën e shkeljes etike ka pasur aftësi mendore dhe veprën penale e ka kryer në fajësi.
2. Profesionisti nuk është etikisht përgjegjës nëse në kohën e shkeljes nuk ka pasur aftësi mendore që të gjykojë veprimin të cilin e ka ndërmarr.
3. Përshtatshmërisht dispozitat për përjashtimin e përgjegjësisë penale nga Kodi Penal do të zbatohen me rastin e konstatimit të përjashtimit të përgjegjësisë etike.

Neni 7

Format e fajësisë

1. Shkelja etike mund të kryhet me dashje apo nga neglizhenca.
2. Shkelja etike është bërë me dashje nëse shkelësi ka qenë i vetëdijshëm për veprimin të cilin e ka ndërmarrë dhe dëshiron, respektivisht pajtohet me veprimin i cili është në kundërshtim me normat etike.
3. Shkelja etike është bërë nga neglizhenca nëse shkelësi nga mendjehetësia mendon se nuk është duke vepruar në kundërshtim me normat etike, ndërkaq ka qenë i obliguar që të jetë i vetëdijshëm se me veprimi i tillë është në kundërshtim me normat etike.

Neni 8

Individualiteti i përgjegjësisë etike

1. I paraqituri bartë përgjegjësi individuale etike për veprimet apo mosveprimet që i ndërmerr me rastin e ushtrimit të veprimtarisë nga profilet e OIK
2. Në raste kur shkelja bëhet në bashkëveprim apo bashkëkryerje, secili anëtarë është përgjegjës për veprimin apo mosveprimin e tij i cili është në kundërshtim me normat etike.

Neni 9

Kategorizimi i shkeljeve etike

1. Shkeljet etike klasifikohen në :

- a. Shkelje të lehta
- b. Shkelje të rënda

Neni 10

Kategorizimi i masave disiplinore sipas llojit të shkeljes

1. Klasifikimi i shkeljes në të lehtë apo të rëndë bëhet nga Këshilli Etik. Me rastin e klasifikimit të shkeljes, Këshilli Etik vendos me të paktën 4 vota.
2. Me rastin e klasifikimit Këshilli Etik merr për bazë:
 - 1) Shkallën e përgjegjësisë etike
 - 2) Motivet e shkeljes
 - 3) Dëmtimin e vlerës së mbrojtur
 - 4) Rrethanat në të cilën është bërë shkelja
 - 5) Sjelljen e mëparshme të shkelësit
 - 6) Pranimin e fajit
 - 7) Zotimi se i njëjti nuk do të përsërit shkeljen e njëjtë.
3. Rastet e veprimit në kundërshtim me nenet 13, 14, 15, 16, 19, 20, 24, 27, 28, 30, 34, 35, 37, 41, 44, 45 të Kodit Etik si dhe përsëritja e shkeljes së lehtë brenda periudhës 12 mujore nga masa e shqiptuar, klasifikohen si shkelje të rënda dhe nuk mund të ndryshohen nga Këshilli Etik pavarësisht nga paragrafi 1.

Neni 11

Rregullat e përgjithshme për matjen e propozimit për masë disiplinore

1. Prokurori i Odës me rastin e propozimit të caktimit të dënimit për shkeljen etike, do ta ketë parasysh kategorizimin e paraparë me Kodin Etik si dhe qëllimin e masës disiplinore dhe rrethanat në të cilat është bërë shkelja.
2. Masa disiplinore e propozuar duhet të jetë në proporcion me peshën e shkeljes, pasojën e mundshme të shkaktuar dhe rrethanat në të cilat është kryer.
3. Me rastin e caktimit të propozimit të masës disiplinore, merr parasysh por nuk kufizohet vetëm në rrethanat e përcaktuara në dispozitat e kodit etik.

Kapitulli III - Parimet e përgjithshme të procedurës

Neni 12

Parimi i ligjshmërisë

1. Prokurori i Odës gjatë zhvillimit të procedurave mbi vërtetimin e dyshimit të bazuar për përgjegjësi etike dhe profesionale të anëtarit të paraqiturit që është subjekt i procedurës së tillë, do të veprojnë në pajtim me Ligjin për Odat e Profesionistëve Shëndetësorë, Statutin e Odës, Kodin Etik dhe aktet normative të Odës,

Neni 13

Parimi i barazisë dhe mos diskriminimit

1. Palët në procedurën pranë Prokurorit të Odës janë të barabarta dhe duhet të trajtohen pa diskriminim.
2. Dallimi në trajtimin e çështjeve justifikohet vetëm nëse dhe për aq sa ai përputhet me ndryshimet objektive të çështjeve përkatëse.

Neni 14

Parimi i objektivitetit dhe paanësisë

1. Prokurori i Odës gjatë zhvillimit të procedurës është i detyruara që të veprojnë në mënyrë objektive dhe të paanshme.
2. Në procedurën që zhvillohet pranë Prokurorit të Odës, Prokurori është i detyruar të shmang çfarëdo konflikti të interesi duke mos u ndikuar nga ndonjë interes personale, familjar, politik apo çfarëdo ndikimi që do të mund të cenonte objektivitetin dhe paanshmërinë e Prokurorit.

Neni 15

Parimi i prezumimit të pafajësisë

Pala kundër të cilës është iniciuar procedura për vërtetimin e përgjegjësisë etike dhe profesionale do të konsiderohet e pafajshme deri në nxjerrjen e vendimit të organit kompetent që ka marrë formën e prerë me të cilin është vërtetuar përgjegjësia etike dhe profesionale.

Neni 16

Parimi i pritshmërisë së ligjshme dhe të arsyeshme

Veprimet e Prokurorit duhet të jenë të parashikueshme dhe të jenë në kuadrin e pritshmërisë të respektimit të parimeve të përgjithshme ligjore dhe të parimeve të përkufizuara me këtë rregullore.

Neni 17

Parimi i efikasitetit dhe ekonomizimit të procedurës

1. Prokurori në zbatim të procedurave të parapara me Ligjin për Odat e Profesionalistëve Shëndetësor, Statutin, aktet normative të Odës dhe këtë rregullore do të veprojë sipas afateve të parapara ligjore dhe në bazë të arsyeshmërisë për veprimet për të cilat nuk janë përcaktuar afatet në mënyrë taksative.
2. Me rastin e zbatimit të procedurës, Prokurori do të kujdesen që palëve mos t'i shkaktohen shpenzimet e panevojshme. Veprimet procedurale do të jenë të kufizuara mbi bazën e nevojës të qëllimit të procedurës që zhvillohet.

Kapitulli IV – Kompetenca e fillimit të procedurës për Mbikëqyrjes Etike dhe Profesionale

Neni 18

Kompetenca e Prokurorit

1. Prokurori i Odës është organ kompetent për fillimin e procedurës së përcaktimit të përgjegjësisë profesional etike të anëtarëve sipas detyrës zyrtare apo sipas kërkesës nga palët e autorizuara

2. Kompetenca e Prokurorit të Odës, shtrihet ndaj të gjithë anëtarëve pa marrë parasysh pozitën e tyre.

Kapitulli V – Përfundimi i prokurorit të Odës nga procedura

Neni 19

Shkaqet e përfundimit

1. Prokurori, nuk mund të ndërmarrin veprime procedurale në çështjen konkrete të proceduar pranë organit kompetent, nëse:
 - 1.1. me palën, me përfaqësuesin ligjor apo me të autorizuarin e palës, është në gjini të gjakut në vijë të drejtë deri në cilëndo shkallë, kurse në vijë të tërthortë deri në shkallë të katërt, apo në qoftë se është bashkëshort apo në gjini të krushqisë deri në shkallë të dytë, pavarësisht nëse martesë ka pushuar ose jo;
 - 1.2. kur bashkëshorti apo partneri bashkëjetues, apo të afërmit e tij deri në shkallë të dytë, kanë një interes personal direkt apo indirekt në çështjen në fjalë;
 - 1.3. kur është vetë palë, përfaqësues ligjor apo i autorizuar i palës, apo me palën është kreditor apo bashkë kreditor, debitor apo bashkë debitor, apo në qoftë se në të njëjtën çështje është dëgjues si dëshmitar apo si ekspert, apo ka marrë pjesë në procedurë si këshilltar apo avokat i palës;
 - 1.4. anëtar i organit apo personat e parashikuar nga nën paragrafi 1.2. i këtij neni, kanë një interes direkt apo indirekt në një çështje të ngjashme me çështjen në fjalë;
 - 1.5. personat e përmendur në nën paragrafin 1.2. të këtij neni, kanë marrë pjesë si ekspertë, dëshmitarë, këshilltarë apo avokatë në çështjen në fjalë;
 - 1.6. ndërmjet anëtarit të organit apo personave të përmendur në nën paragrafin 1.2. të këtij neni, ka një proces gjyqësor me palët;
 - 1.7. nëse është pjesë apo shqyrton si organ epror ankesën e një akti të marrë prej vetë atij, ose nga personat e përmendur në nën paragrafin 1.2 të këtij neni;
 - 1.8. me palën, përfaqësuesin apo të autorizuarin e palës, është në marrëdhënie të kujdestarit, birësuesit apo të ushqyesit;
 - 1.9. në çdo situatë tjetër, parashikuar shprehimisht me ligj apo që mund të vë në dyshim paanshmërinë e tij.
2. Prokurori i Odës është i obliguar që të kërkojë përfundimin e tij gjatë trajtimit të rastit në cilëndo kohë që vihet në dijeni për ekzistimin e ndonjëres nga rrethanat e përcaktuara sipas paragrafit 1 të këtij neni.
3. Kërkesa i parashitohet organit i cili vendos për kërkesat e palëve për përfundim.

Neni 20

Kërkesa për përfundim

1. Palët në procedure mund të parashitjnë kërkesën për përfundimin e Prokurorit posa të vihet në dijeni për ekzistimin e ndonjëres nga rrethanat që bien në dyshim paanshmërinë apo paanësinë e tij.
2. Kërkesa për përfundim të Prokurorit parashitohet deri në përfundimin e çështjes me vendim të formës së prerë.

3. Organi kompetent për vendosje lidhur me përjashtimin e anëtarit të organit duhet të vendos për kërkesën e parashtruar në afat prej 5 (pesë) ditëve nga parashtrimi i kërkesës.

Neni 21

Kompetenca për vendosje lidhur me përjashtimin

1. Për kërkesat që kanë të bëjnë me përjashtimin e Prokurorit apo Zëvendësprokurorit, vendos Kryetari i Odës.
2. Në rastin e përjashtimit të Prokurorit, funksionin e tij e ushtron zv. Prokurori.
3. Zëvendësimi Prokurorit dhe Zëvendësprokurorit si organe individuale në rast se të dy ndodhen në situata të konfliktit të interesit, bëhet me propozimin e Kryetarit të Odës, i miratuar nga Këshilli Drejtues. Ushtruesi i detyrës të Prokurorit dhe Zëvendësprokurorit ndërmerr veprimet vetëm në çështjen për të cilën është bërë zëvendësimi deri në përfundimin e çështjes me vendim të formës së prerë.

Kapitulli VI – Subjektet e procedurës disiplinore

Neni 22

Palët në procedurë

1. Palët në procedurë pranë Prokurorit të Odës, mund të jenë :
 - 1.1 Parashtruesi i ankesës;
 - 1.2 Pala e dëmtuar;
 - 1.3 Palët e autorizuar sipas dispozitës së Nenit 32 të Ligjit për Odat e Profesionistëve Shëndetësor.

Neni 23

Zotësia e palëve dhe përfaqësimi

1. Në procedurë pranë Prokurorit të Odës mund të paraqitet çdo person fizik dhe juridik në cilësi të palës së autorizuar në përputhje me dispozitat e Nenit 32 të Ligjit për Odat e Profesionistëve Shëndetësor.
2. Personi fizik në cilësi të palës në procedurë ka zotësi të veprimit nëse është në moshë madhore apo e ka fituar zotësinë .
3. Përfaqësimi i personave pa zotësi të veprimit bëhet në pajtim me rregullat e Ligjit për Procedurën Kontestimore në përputhje me referimin ligjor nga Ligji për Procedurën e Përgjithshme Administrative.

Neni 24

Kompetencat dhe përgjegjësitë e Prokurorit të Odës

1. Kompetencat dhe përgjegjësitë e Prokurorit të Odës janë:
 - 1.1 Ndërmerr veprimet që janë të nevojshme për hetimin e shkeljes etike dhe profesionale;
 - 1.2 Siguron informacione për nevojat e vërtetimit të ekzistimit të dyshimit të arsyeshëm lidhur me shkeljen mbi të cilën rëndon dyshimi;

- 1.3 Shqyrton ankesat e palëve të dëmtuara dhe varësisht nga baza provuese paraqetë propozim-ankesën pranë Këshillit Etik apo e hedhë si të pabazuar ankesën;
 - 1.4 Inicion procedurat disiplinore-etike sipas detyrës zyrtare dhe varësisht nga rezultati hetimore paraqet fletëparaqitje ndaj të paraqiturit pranë Këshillit Etik;
 - 1.5 Propozon pezullimin e licencës së profesionistit shëndetëso
 - 1.6 Përfaqëson propozim-ankesën dhe fletëparaqitjen sipas detyrës zyrtare në procedurë pranë Këshillit Etik dhe Gjyqit të Nderit;
 - 1.7 Ushtron mjetin e rregullt juridik pranë Gjyqit të Nderit;
 - 1.8 Bashkëpunon me organet të tjera të Odës dhe institucionet publike lidhur me ushtrimin e kompetencave të tij; dhe
 - 1.9 Ndërmerr veprimet të tjera të parapara me këtë rregullore.
2. Kompetencat nga paragrafi 1 i këtij neni ushtrohen edhe nga zëvendësprokurori i Odës me autorizim të Prokurorit të Odës. Prokurori i Odës mund ta organizojë menaxhimin e lëndëve të pranuara me koordinim me zëvendësprokurorin për ndarje të lëndëve mbi baza të rregullta pa pasur nevojë për autorizim paraprak.

Kapitulli VII – Inicimi i procedurës

Neni 25

Inicimi i procedurës

1. Procedura disiplinore ndaj të paraqiturit inicohet në bazë të aktit iniciues për hapjen e procedurës etike të palës së dëmtuar dhe kërkesës të institucioneve publike që janë përkufizuar me dispozitat e Ligjit për Odat e Profesionistëve Shëndetësor, Statutin dhe këtë rregullore.
 - a) Me rastin e inicimit të procedurës nga pala e dëmtuar, procedura mund të jetë konfidenciale në raport me identitetin e ankuesit në përputhje me ligjin për sinjalizues.
2. Procedura disiplinore po ashtu inicohet sipas detyrës zyrtare me aktin iniciues për hapjen e procedurës etike të Prokurorit të Odës, në çdo rast kur ai është njoftuar nga cilido burim se anëtar i Odës gjatë ushtrimit të profesionit të ketë vepruar në kundërshtim me etiken profesionale dhe detyrimet ligjore përkitazi me ushtrimin e profesionit
3. Aktet incizuese për hapjen e procedurës etike nga pala e dëmtuar procedohet për shqyrtim pranë Prokurorit, i cili në bazë të veprimeve hetimore nxjerrë përfundimin lidhur me ekzistimin apo jo të dyshimit të bazuar se i paraqituri ka vepruar në kundërshtim me normat etike dhe profesionale.
4. Aktet incizuese për hapjen e procedurës etike nga institucionet publike procedohen drejtpërdrejt pranë Këshillit Etik dhe ndaj të njëjtave ekziston prezumimi i ekzistimit të dyshimit të bazuar.
5. Në rast kur aktet iniciuese për hapjen e procedurës etike parashtrihen nga institucionet publike dhe vlerësohen nga Këshilli Etik se kanë të meta, ato do t'i dërgohen sipas detyrës zyrtare për shqyrtim dhe vlerësim Prokurorit të Odës.

Neni 26

Përmbajtja e aktit iniciues për procedurën etike dhe parashtrësive në procedurë

1. Aktet incizuese të palëve, mjeti juridik, përgjigja në ankesë, kërkesa për rihapje të procedurës, si dhe parashtrësat të tjera që paraqiten gjatë zhvillimit të procedurës, duhet të paraqiten me shkrim.
2. Parashtrësata nga paragrafi 1 i këtij neni duhet të jenë të kuptueshme dhe të përmbajnë çdo gjë që nevojitet dhe e mundëson veprimin sipas tyre. Ato duhet të përmbajnë veçanërisht: emrin e organit që i drejtohen, emrin dhe mbiemrin (emërtimin e personit juridik), vendbanimin apo vendqëndrimin (selinë e personit juridik) e palëve, të përfaqësuesve të tyre ligjor apo me prokurë, po që se i kanë, çështjen të cilës i referohen, përmbajtjen e deklaratës dhe nënshkrimin e parashtruesit (formulari).
3. Dështimi i përmbushjes së kushteve nga paragrafi 2 e bën parashtrësën si jo të plotë dhe si e tillë konsiderohet se është tërhequr, nëse pala dështon ta plotësojë atë sipas afatit të dhënë për plotësimin e saj (7 ditë)

Neni 27

Shqyrtimi i akteve iniciuese për procedurën etike nga Prokurori i Odës

1. Çdo akt iniciues për hapjen e procedurës disiplinore etike të paraqitur nga palët e dëmtuara (personat fizik) paraprakisht shqyrtohet nga Prokurori i Odës, i cili është i obliguar që të vërtetojë se a ekziston dyshimi i bazuar për pretendimet të cilat janë përfshirë në ankesën e parashtruar.
2. Gjatë shqyrtimit Prokurori i Odës merr parasysh bazën provuese dhe sipas diskrecionit nxjerrë përfundim se a ekziston dyshimi i bazuar për shkeljen e pretenduar. Në rast se Prokurori i Odës konsideron se ekziston dyshimi i bazuar se i paraqituri ndaj të cilit është paraqitur akti iniciues ka vepruar në kundërshtim me Kodin Etik dhe aktet tjera, Prokurori i Odës përpilon aktin iniciues dhe e dërgon në Këshill Etik për procedura të mëtejshme.
3. Në kuadrin e kompetencave Prokurori i Odës mund të hetojë shkeljen eventuale të paraqiturit dhe me këtë rast me qëllim të vërtetimit të ekzistimit apo jo të dyshimit të bazuar, sipas përfundimeve të arritura gjatë hetimit, respektivisht gjatë mbledhjes së informatave të paraqet aktin iniciues pranë Këshillit Etik.
4. Autorizimet nga ky nen mund të ushtrohen edhe nga zëvendësprokurori i Odës.

Neni 28

Procedura hetimore

1. Prokurori i Odës fillon procedurën hetimore në momentin që pranon aktin iniciues nga pala e dëmtuar apo edhe kur vihet në dijeni se është bërë shkelja nga i paraqituri i cili është anëtar i Odës.
2. Procedurën hetimore e fillon Prokurori pa pasur nevojë që të nxjerrë vendim të veçantë mbi fillimin e hetimeve.
3. Procedura hetimore nuk mund të zgjasë më gjatë se 6 (gjashtë) muaj nga dita kur është pranuar ankesa, tek rastet e shqyrtimit të ankesave nga palët e dëmtuara. Në raste të tilla, hetimi pushon sipas fuqisë juridike (ex iuris).
4. Prokuro i Odës duhet të ketë vëmendje të veçantë për kufizimin kohorë një vjeçare për paraqitje të rastit në gjyq të nderit, duke ndërmarrë veprime të efektshme dhe sa më të hershme të

mundshme, në mënyrë që të ruhet e drejta e anëtarit të paraqitur për realizimin e ankesës pranë organeve tjera etike.

Neni 29

Hedhja e aktit iniciues

1. Prokurori i Odës me aktvendim e hedhë aktin iniciues të parashtruar nga pala në rast se nga aktiviteti hetimor rezulton se:
 - 1.1 Nuk ekziston dyshimi i bazuar se është bërë shkelja etike;
 - 1.2 Ka kaluar afati për inicim të procedurës; ose
 - 1.3 Ekzistojnë rrethanat të tjera që e bëjnë përjashtimin e përgjegjësisë etike.
2. Aktvendimi nga paragrafi 1 i këtij neni i dërgohet palës e cila ka parashtruar aktin jo më vonë se 8 (tetë) ditë nga nxjerrja e të njëjtit.
3. Pala e pakënaqur me aktvendimin e Prokurorit të Odës mund të parashtojë ankesë pranë Këshillit Etik në afat prej 15 (pesëmbëdhjetë) ditëve nga dita e pranimit të aktvendimit.

Neni 30

Procedimi i çështjes në Këshill Etik

1. Prokurori i Odës pas zhvillimit të hetimeve sipas kësaj rregulloreje i paraqet Këshillit Etik aktin iniciues për hapjen e procedurës etike me të gjitha materialet provuese.
2. Procedimi i çështjes pranë Këshillit Etik sipas paragrafit 1 të këtij neni bëhet menjëherë pas nxjerrjes së aktit iniciues
3. Aktet incizuese për hapjen e procedurës etike të parashtruara nga Prokuroria e Shtetit, Inspektorati Shëndetësor, Ministria e Shëndetësisë apo ndonjë institucion publik, trajtohen drejtpërdrejt nga Këshilli Etik dhe të njëjtat nuk i përfaqëson Prokurori. Aktet e tilla procedohen në mënyrë të njëjtë sikurse aktet e Prokurorit dhe për ankesat të njëjta ftohet në seancë përfaqësuesi i institucionit për përfaqësimin e pretendimeve ankimore.

Neni 31

1. Në aktin iniciues për hapjen e procedurës etike, Prokurori i Odës bën kualifikimin paraprak të shkeljes etike për të cilën ekziston dyshimi i bazuar se është bërë nga i paraqituri. Këshilli Etik nuk është i lidhur domosdoshmërisht për kualifikimin e bërë nga Prokurori i Odës dhe gjatë shqyrtimit dhe vendosjes për çështjen për të cilën është duke u zhvilluar procedura mund të bëjë rikualifikimin po që se gjendja faktike i përgjigjet një forme tjetër etike të sanksionuar me Kodin Etik.
2. Prokurori i Odës mund t'i propozojë Këshillit Etik shqiptimin e masës konkrete disiplinore. Këshillit Etik në rastin e propozimit të Prokurorit të Odës për shqiptimin e masës disiplinore nuk është i lidhur dhe për këtë mund të vendosë shqiptimin e ndonjë mase tjetër që i përgjigjet shkeljes e cila është vërtetuar se është kryer.

Neni 32

Përmbajtja e aktit iniciues për hapjen e procedurë etike

1. Akti iniciues për hapjen e procedurës etike i Prokurorit të Odës përpilohet në formë të shkruar dhe së paku duhet të përfshinë:

- 1.1 Emrin dhe mbiemrin, numrin e telefonit kontaktues, adresën e vendbanimit apo vendqëndrimit të palës që ka parashtruar ankesën, në rast të fletëparaqitjes;
- 1.2 Emrin dhe mbiemrin, numrin e telefonit kontaktues, adresën e vendbanimit apo vendqëndrimit të paraqiturit ndaj të cilit është vënë dyshimi se ka bërë shkeljen;
- 1.3 Përshkrimi i veprimit apo mosveprimit me të cilin pretendohet se është bërë shkelja;
- 1.4 Saktësimi i provave dhe dëshmive të mbledhura nga Prokurori i Odës;
- 1.5 Arsyetimi për ekzistimin e dyshimit të bazuar në bazë të përfundimit të Prokurorit të Odës;
- 1.6 Kualifikimi i shkeljes dhe propozimi për shqiptimin e masës disiplinore; dhe
- 1.7 Data dhe nënshkrimi i Prokurorit të Odës.
- 1.8 Në rast se është shqiptuar tërheqja e përkohshme e licencës, prokurori propozon ndërprerjen e masës apo vazhdimin e sajë edhe për një periudhë jo më të vogël se 3 muaj.

Neni 33

Pezullimi/tërheqja e përkohshme e licencës

1. Në rastet e fillimit të procedurës për shkelje të rëndë të Kodit Etik të Odës, prokurori i Odës mund të nxjerrë aktvendim me propozimin për tërheqje të përkohshme të licencës për periudhë deri në 6 muaj.
2. Ndaj propozimit në paragrafin 1, vendosë Këshilli Etik i Odës brenda 15 ditëve nga dita e pranimit të propozimit.
3. Ndaj vendimit të Këshillit Etik, pala e pakënaqur mund të ankohet në gjyqin e nderit të OIK brenda 15 ditëve nga pranimi i vendimit.

DISPOZITAT PËRFUNDIMTARE

Neni 34

1. Me hyrjen në fuqi të kësaj rregullore, shfuqizohet rregullorja nr. 1235 e datës 31.12.2019.
2. Çështjet e iniciuara pas hyrjes në fuqi të kësaj rregulloreje, do të procedohen sipas dispozitave të kësaj rregulloreje. Çdo ndryshim eventual me rastin e miratimit të saj nga Kuvendi i OIK do të zbatohet në favor të palës kundër të cilës është iniciuar procedura.

Neni 35

Hyrja në fuqi

Kjo rregullore hyn në fuqi ditën e miratimit të saj nga Kuvendi i OIK.

Kryetare e OIK
Nexhmije Gori



Prishtinë, 2025

